

KEY STATEMENTS FOR THE 2025 THANKSGIVING BLENDING CONFERENCE

**Tihin mami lawng n'ngoena tah aka hing Aisi la aka awm vanben Khrih kah
dung oen aka vai, tlek aka awm huhdoenna, aka aing hudoenna ni.**

**Atak la Imanuel tah mami kah muithla ah aka soepbir thumkhat Pathen kah
mikhai la aka awm soengna kah Muithla la awm.
Bawipa kah mikhai tah hinat coeng hinat bueng nawh tih
atue pakhat coeng pakhat mami kah muithla ah
mami oen awm haih poepa la awm.**

**Pathenben thumkhat Pathen coengna kah acaihkoek phawngna tah
Matthai 28:19 la awm. "Te dawngah nangmi cet lang tah
namtawm thlaangthli te ka hubaang la awm sak,
Pa, Capa, Ciimuithla kah ming khuiah Baptisma van pe u."**

**Khawhihui ah aka bou alawngim pahih awm-
Pathen kah saithai aana oen Setan kah pungnawina la awm.
Pathen oen Setan laklaw kah a rawl awmnawh awlpungna tah
saithai aana oenah tuhkaai la awm.**

**Outline of the Messages
for the Thanksgiving Blending Conference
November 27-30, 2025**

**GENERAL SUBJECT:
MATTHAI CABU DAWNG APHAWNG ANGLA
SOEPREP AKA THUM KHRIH**

Message One

**Aka Hing Aisi la Aka Awm Vanben Khrih kah
Dung oen Aka Vai, Tlek Aka Awm, Aka Hing Hudoenna**

Caciim tee ham; ; Matt, 2:1-12; Num, 24:17; Gen, 1:14-19; Dan, 12:3;
Awl, 1:16, 20; 2:1, 28; 3:1; 22:16; 2 Pit, 1:19; Gen, 22:17; Jud, 12-13

I. Jesu he Bethlahem khaw ah thang la a awm coeng ah khawlawben kah Magi thlaangcuih lawng Jerusalem la law tih “Juda thlaangthli kah sengpahrang aka thang te meah a awm? Ahih kah aisi te khawlaw benah kahuh u dawngah amah bawk hamla ka law u” (Matt, 2:2). Hetah Number 24:17 kah soepbirna la awm, te lawng “Jakob khui kalawng aisi pakhat law vetih” tila athui. He aisi tah Khrih te thuingaihna la awm.

- A. Magi thlaangcuihthli lawng “aisi pakhat te kahuh u” nawhatah te aisi te ka huh u” tila thui nawh tih, “ahih kah aisi te ka huh” tila athui u. Te aisi tah vanben Khrih la awm.
- B. He cathan lawng athui aisi tah hekah thlaangcuihthli tengah atueng pe la awm. Tetah Israel kah thlaangthli khuiah u khatca teng ahkhaw aphou pe nawh. Judathli tengah Khrih oen tuhkai la Cabuciim awm tih, Bawipa tah ame huenah athang ai tite aming u decatah (Matt, 2:4-6), Magi thlaangcuihthli lawng Khrih kah aisi te ahuh u.
- C. Judathli tengah Khrih athangna oen tuhkai la ca dawng buengah cuih u (Mik, 5:2), tede hekah khawlawben thlaangcuihthli tah Bawipa kah akahing huhdoenna te adang u. Hukhuengah aisi lawng Khrih a awmna huen la tethli te a maawt (Matt, 2:1-12).
- D. Khrih tah aka soeng khawmik la awm (Mal, 4:2), tede thui mangkhakna la Bawipa he ziinthum dung veng heah khawmik la va thoeng nawh. Te zuengla Bawipa tah aisi la va aang (Awl, 2:28). Aisi he khawzin ah vang, tede telawng khawthai tue avan pha ai tite thuingaihna la awm (Rom, 13:11-14).
- E. Khrih lamha alaw vengah Bawipa tah aisi la langza la va law, tede Bawipa apabe alaw koep vengah Bawipa alawkoepna te aka lamtoen taacathli hamla aisi tumpa (Awl, 2:28; 22:16) la awm ai. Atloethli tengah Khrih he hukhuengben khawmik la athoeng pe ai (Mal, 4:2; cf, Matt, 13:43).

II. Matthai 2:1-12 ah Khrih te n’huh natah akahing kawnglam la awm tite thui la awm. Tetah cabuciim kah pawmnaben cuihna kawng bueng doek mai nawh ni.

- A. Aisi he aciim khawpui kah tempul kalawng, Juda phungbawkna alungkir kalawng, khawsoihthli, cathutkungthli, Farasithli, phungbawknaben thlaangthli teng kalawng thla thlang la athoeng pe. Te zueng la aisi tah Gentilethli kah ramah Khrih kah pakhat khat te tueng sakna awm.
- B. Cabu ciim te mami kutah n’pawm tih, Khrih he Bethlahem khawah thang ai tila aka thui Mikah 5:2 te n’tee bueng he n’tu lakhaw coeng nawh. Mami ah cabuciim awm mai thai, tede vanben aisi oen n’dalhna lakhaw awm mai thai.
- C. Aisi tah akahing phawngna, akahing huhdoenna la awm tih, aka ruemraw, akaduek pawmnaben cabuciim mingna bueng nawh ni, Mikah 5:2 te aka duek mingciimna nawh ni. Tihin mami n’ngoena tah cabuciim te mingciim ham bueng nawh tih, vanben huhdoenna, dung oen akavai, tlek aka awm huhdoenna, akahing huhdoenna, thlaanghing poek patuemnathli lawng aka cangpui thai nawh huhdoenna ni.
- D. Mami ah cabuciim te mingciimna awm cakhaw, mami tah Jesu awmna te lawngpui oen te im la aka maawt tlek aka awm, dung oen aka vai akahing aisi te n’ngoe u toeng toeng huen.

- E. Akhing huhdoenna te n'huh coeng atah Magi thlaangcuihthli lawng thlaanghing poek patuemnathli oen lawngpui phel u tih, Juda ram kah khawpui Jerusalem khaw, tekah sengpahrang la awm mai thai tila apoekna huen la apha u. Tethli kah lawngpui phelhna lawng camoe tawngpa zahawh te duek sak la awm – Matt,2:16.
- F. Tethli tah Jerusalem khawah apha tih Judathli kah sengpahrang ame hueah athang ai? Tila adooet vengah Cabuciim lawng “te awl te azaak vengah, sengpahrang Herod tah avaangkhuu kah thlaangthli boeih oen kawpoek patang u” tila athui – athan,3.
1. Tethli lawng he awlthang te azaak u vengah awmngaih u ouhla, kawpoek lat patang u. Hetah atloe kawng dawng nawh tih, thlawnkung te asoeng la tlapna a awm u nawh dawng ni (Bawipa law sak ham aka lamtoen nawhtah pawmsang ham aka lamtoen Khrih thlaang pakhat lawng hehe ngaithuen peekna la akhuen ham ni) – cf, Tat,4:23.
 2. Bawipa ah oengca pakhat lawng akhuiben khnasana dawngah lungna la aka awm Bawipa rangoen betphana a awmnawh atah, Khrihthlaang pakhat la khue ham koeih nawh – 2Tim,4:8; Mark,12:30; 1Kor,2:9.
 3. Bawipa lawsak ham aka lamtoen nawhatah pawmsang ham aka lamtoen Khrihthlaang pakhat lawng hehe ngaithuen peekna la akhuen ham ni – 2Tim,4:8; Tit,2:13; Awl,2:18; 22:20; Matt,24:40-44; 25:8-13.
- G. Magi thlaangcuihthli tah cabuciim rangoen doeng sakla a awm coengah (Matt,2:4-6), tethli tah Bethlahem khaw la cet u tih (athan,8-9), aisi tah tethli tengah aphou pe koep tih Khrih a awmna huen la tethli te amaawt, “te aisi te a huh vengah, awmngaih u tangkiik” (athan,10).
1. Magi thlaangcuihthli tah cabuciim rangoen doeng sakla a awm coengah, akasoeng lawngpui sawah apha u koep vengah aisi tah tethli tengah aphou pe koep. Akahing huhdoenna tah cabuciim oen haih koe koe ah rep ahiih.
 2. Khawsoihthli tah aana-awl te thlaangthli teng aka cangpui kungthli la awm u tih (Mal,2:7), cathutkungthli tah Baibul te akamingthli la awm u (Eza,7:6). Khawsoihthli oen cathutkung pahih bawk lawng Khrih kah athangna oen tuhkai la mingna akhueh u de catah (Matt,2:5-6), khawlawben kah Magi thlaangcuihthli oen vai ouhla tethli lawng huhdoenna huh u nawh tih, Khrih te tlap ham thinkaw khaw awm u nawh.
 3. Mami mezoeh toe “Baibulben” n’cuihthoem khawseh, Bawipa kah mikhuu te n’sung mai kawi nih apum boeih la soeng tlaih nawh. Bawipa te tlapna oen ahu bang hamla awlkhueh thai lawngim tah Bawipa kah aka huep mikhuu ah boet ouhla awmpoena te ni – Jhn,5:39-40; Isa,45:15; Exo,33:11, 14; cf, 2Kor,5:16.
 4. Baibulben cuihthoemna te tlap hamla tah zoeica de, mami ah akahing lawngpui nueh n’ngaih atah Bawipa oen haih beroep loupang la tuhphana dawngah khaw n’sak ham ni. Mami tah Bawipa oen haih pumkhat la n’awm ham ni – 2;10-14.
 5. Magi thlaangcuihthli lawng Khrih te a huh u tih, Bawipa te akoehbaw u. Te coengah Herod tengla mel koep nawh hamla Pathen lawng mang ah ngaithuen apeek dawngah, “atloe lawngpuihen kalawng” amah ram la mel u (Matt,2:12). Mami Khrih te n’huh coeng atah, Khrih oen aka thla akavai phungbawkna lawngim te meveng khaw khuen ouhla, atloe lawngpui te n’khuen poepa ham ni.

III. Khrih kah uepawm hubaangthli tah aka ang, akahing aisithli la awm u tih, Bawipa kah mulawh la awm ham aka ang, akahing aisi la Khrih hubaangthli la awm u – Dan,12:3; cf, Gen.22:16.

- A. Akahing aisithli tah Pathen kamthlahna kah alungkirben oen khawhihuiben la aka awm Khrih kah vanben, akahing, dung oen akavai, tlek aka awm huhdoenna huah baang u - Cel,26:16-18; Kol,1:17b, 18b.
- B. Akahing aisithli tah Pathen kah thlaangthli te zouthen akapa kungthli la awm u. Mami Pathen kah thlaangthli hamla Bawipa te n’koeh tare, oengna dawngah tethli te koehna awl n’thui tare veng, n’mah oen mah te Pathen kah zouthenna huah khuehna tare la awm – Num,24:9; Gen,12:2-3; 22:17.
- C. Akahing aisithli tah cabuciim kah awlphawng awl te “zinna huen ah akavaang haikhuat angla” awlpui la khueh u, tetila aisi tumpa la aka awm Khrih lawng tethli kah thinkaw dawngah hinat coeng hinat aphou pe thai poen ai. Mami cabuciim kah awl te awlpui la n’khueh u kawi nih, aisi tumpa la Bawipa alawna

tang tang thlan vengah, tihin mami n'awmna huen ah akaphelh u zinna dung tue ah vaang hamla mami kah thinkawthli dawngah Bawipa aphouna awm poen ai – 2Pit,1:19; Jhn,6:63; Awl,2:28; 22:16; 2Tim,4:8.

1. Aisi tumpa kah alawngim dawng Khrihthlaang pakhat he mincanghii ah ahinghang ham ni, metitiah mincanghii he Bawipa te hum ham (Pathen oen pawlneng ham, koeh tih laasak ham, cabuciim te bibina oen haih thangthui tee ham, Bawipa teng thangthui ham) aka theen tangkiik atue la awm - Laa,7:12; Saam,5:1-3; 57:16-17; 63:1-8; 90:14; 92:1-2; 108:2-3; 143:8; Exo,16:21.
 2. Bawipa te akalungna thlaang, Bawipa te aka toet tih aka lamtoeng thlaangthli tengah aisi tumpa la Bawipa amah te ahuep cala pe u ai, tedeng ni tethli lawng kum santhlang athla coengah Bawipa alawkoepna dawngah Bawipa kah mikhuu caihpanna te ateng thai u la awm ai – 1Thes,5:6; Awl,2:28; 3:2-3; 16:15.
- D. Akahing aisithli tah pueh pasarih aka sang Muithla te awmngaih u tih, Bawipa oen be u tih, Bawipa lawng tethli nala Pathen kah sakna hamla pueh asang tih ahingpuina oen pueh asang tih vaangna la awm sak – Awl,3:1; 4:5; 5:6.
- E. Akahing aisithli tah thlangboelthli kah celuihthli la awm tih, Pathen kah celuih oen Pathen teng kalawng aka caihpan awlthang la aka awm neumetik Khrih te awmngaih tih ahuhawng u, tetila tethli tah Jesu kah sausi hamla aka caihpan, tlek aka awm Khrih te Pathen kah thlaangthli khuiah arekraa pe u thai – 1:16, 20; 2:1; Mal,3:1-3.
- F. Akahing aisithli tah “akalen thinkaw tungsaknathli” oen “akalen thinkaw tlapnathli” la awm u. Tethli tah Pathen kah thenngaihthli la awm tih, “amami kah lawngpui kalawng aisithli” angla Bawipa kah araal te Pathen oen haih aka tukkungthli la awm u, tetila tethli tah “tharaana oen aka thoeng khawmik angla” awm u tih, “amami kah na pa ram ah khawmik angla angna” aka awmthli la awm u poen ai – Awlc,5:15-16, 20, 31; Dan,11:32; Matt,13:43.
- G. Akahing aisithli tah Jehova te aka rihthli, Bawipa tuihzoeih kah awl te aka zaathli, Jehova ah aka ueppangthli la awm u. Tetila tethli tah zinna dawng azingzawi u veng angna te adang u poen ai – Isa,50:10-11; Saam,139:7-12, 23-24.
1. Amami hamla angna akasaithli, Pathen kah angna dawng a awm ouhla amah lawng asai angna dawngah aka zingzawithli tah kawpoek patangna te ahuhawng u ai - Isa,50:11.
 2. Hetah mami tengah ngaithuen peek la awm ham ni, tedengah n'mah hamla n'sai angna dawngah nawh tih, Pathen lawng n'peek angna dawngah n'zingzawi u ham ni, “Va law u lah, Jehova kah angna dawngah zingzawi u lah sih” – (2:50).
- H. Akahing aisithli tah Bawipa kah suenkoep thilna oen haih Pathen kah tlaihawng dangkoepna kah ali hin ah aka awmsak aisithli rangoen ahuhak tih, teah tethli kah angna rangoen uktem la awm. Angna awmna huen ah hingna kah roengna hamla uktemna khaw awm – Gen,1:14-19.
1. Mui thawng la aka awm tlaang ah Bawipa Jesu kah angrawng thengna tah tharaana dawng ram kah alaw nala awm. he angrawng thengna tah atang tang ah thumkhat Pathen kah aka uktem mikhai la awm - Matt,17:1-8; Mark,9:1-8.
 2. Pathen kah ukna, Pathen kah uktemna la tekah zouthennathli oen awmngaihthli boeih oen haih Pathen kah ram tah Bawipa Jesu kah angna oen mami saw a angna rangoen Bawipa Jesu kah pungtaina la awm.
 3. Ram tah Bawipa Jesu kah akasoeng angrawngna la awm. Bawipa tah mami sawah ang tih te angna huiah n'awm u veng roekah, mami kah hingna aroengna hamla mami khuiah Pathen kah ukna oen uktemna huiah a ram dawng n'awm nala awm.
- I. Athe naben ah “aka sawng aroeh aisithli” la aka awm khatsut khaw awm – Juda,12-13.
1. Akasawng aroeh aisithli kah thuingaihna tah cangpui thawlh kungthli, aphelh la aka cangpui kungthli tah vanben phawngna kah aka thawng nawh awltakthli dawngah acak la cakroep u nawh tih, Pathen kah aisi oen akalou thlaangthli tiimah aka zingzawi u roehna te thuinuet na la awm.
 2. Aka thawlh sak tih aka phelhsak kungthli tah tihin kah akasawng aroeh aisithli la awm u tih, hukhuengah tethli tah zinhuepna ah thaawng athlaak ai, tetah dungzan dung khuipuer tethli hamla akhueh pe huen la awm.
 3. Khawhuen thlangboelthli he Pathen kamthlahna kah kawltung nawh tih, Khrih takpum kah akasoeng kawltung phasak hamla lawngpui soeng lani awm tite akacangpui nawhthli boeih tah mikhuu dung

Pathen kah bibi ngoengaihna oen avaihih moenih. Khrih takpum kah asoengna ham thlangboelthli kah cuutna kalawng aka kanghalh u meang thlaang khawseh aka sawng aroeh aisithli la awm. Aksoeng aisi tah thlaang akumngai te doengna benla amel sak koep tih, thlaangthli te lawngpui phelh sak ouhla, akasoeng lawngpui benla aka mel sakkungthli la awm u.

4. Tihin akahing aisi oen akahing aisithli tah mami teng kalawng athla moe nih- tethli tah Khrih takpum kah atak la aka tueng khawhuen thlangboelthli dawngah, te oen haih awm (Awl,1:11, 20). Khawhuen thlangboelthli tiimah akahing aisi khatsut awm. Mami lawng tethli te thlouthlan ham oen tethli oen haih bawngzawng ham angoe. Tethli lawng mami te Jesu awmna huen benla n'maawt poen ai.
- J. Bawipa lawng mami sawah reenna awm tih, mami tah Bawipa te hum ham, Bawipa te bawk ham, Bawipa teng mami kah lungna te nawn ham akasoeng lawngpui dawngah n'khoemdoen poepa hawn she. Bawipa lawng mami boeih te Magi thlaangcuihthli angla awm sak tih, akahing aisi huah bang tih, akahing aisithli la Bawipa kah mui aka thawnthli la awm ham Khrih te tlapna oen aka thai aka huhthli la awm u hawn seh – cf, Efe,5:8-9; Jer,15:16a.

**Pathen kah Zoutheenna Dang hamla Pathen kah Thlaangthli te
Zoutheen Peekna**

“Nang zoutheen aka pethli te zoutheen ka peek vetih, nang thee aka phoi thilthli te thee ka phoi thil van ai;” – Gen.12:3a

“Nang zoutheen aka pethli tah zoutheen taawng u selang, khawsii aka hawng thilthli lawng khawsii zaawk u seh!” – Num.24:9b

CWWL, 1978, vol. 1, “Fellowship with the Serving Ones, Volume One,” p. 203:

Bawipa kah huhna dawngah, tuunnathli te coelcahna tah atheena, ciim nawhna la awm. Bawipa lawng nang te “Hetah ka takpum ni. Nang tah a u nuem. Ka thlangboel kah tuunna ham alantang te aka tloeng atuethen te a u lawng m’peek” tila athui ai. Nang lawng tuunna te thawhlpelna pakhat khat nathui vengah nang lawng pumkhat coengna te na pawcii sak la awm. Thlaangtloethli lawng nang kah aka theen tuunna poektheen peekna te ngaih nawh ti mailah sih. Nang lawng metila nathui ai. Kai lawng tuunna te ka ngaih nawh de catah he lawng pekbounda athoengsak tite ka ming dawngah tukhaw kathui nawh. Kai lawng tuunna te ka ngaih nawh tila thui ham kai he a u nuem. Bawipa kah areen angna tah mami teng ahkhaw, lungna koei thlaangthli tengah khaw pha hawn seh.

Life-study of Exodus, msg. 7, pp. 78-80:

1940 kum acuekben ah Shanghai kah thangthui tuunna pakhat ah poulip pakhat khat awm tih, te lawng Pathen kah thlaangthli te Bawipa lawng metila ahuhna tite mingsak hamla kai te m’bawm. Te tuunna ah huhtawngna aka khueh Miamanau huta bibihui pakhat lawng thlangboel kah atlaakna paihuen rangoen lungbui patang raina atawng tih, thlangboel kah zueng la Bawipa tengah angaih la paang. Ahih athangthui vengah thlangboel kah reen ham apaihuen thawng dawng kawthena oen koupang la awm. Ahih thangthui aboet coengah Miamanau Nee lawng Bawipa te koehna oen pang tih, thlangboel tah meveng ahkhaw thazawlina nawhatah tlaakna awm ouhla, sawsang la awm poepa dawngah Bawipa te a koeh. Aka tuun thlaangthli tah kawpoekrai u. Tecoeng miamanau Nee lawng Israel thlaangthli oen tukhai tih Balaam kah awlphawng huhsakna te zakmingciim hamla mami te m’bawm. Balaam lawng Israel thlaangthli te khawsii hawngsak hamla Balak rangoen vat la awm. Tede Pathen thlaangthli te khawsii hawng sak muehla Balaam lawng tethli te zoutheen apeek. Pathen zuengla awl aka thui Balaam lawng “Jakob tuk ham aidui bueh thilna awm nawh tih, Israel tukna tawiha awl phawngna awm nawh” tila athui (Num.23:21). Te bueng muehla Numbers 24:5 ah Balaam lawng “Aw Jakob, na reh imthli tah theen tangkiik tih, aw Israel, na awmna huen tah theen tangkiik” tila athui. He athanthli angla Pathen lawng Israel thlaangthli dawngah thawhlsaina nawhatah asamphaihna te hu nawh. Te zuengla Bawipa lawng theenna, riepawmna oen thlaangtheenna te ni ahuh. Tihin thlangboel oen tukhai la tetila ni a awm van.

Thlangboel tah tlaakna nawhatah dueksut tila thui boel. Hetila nathui tare veng namah oen mah te khawsii zawkna benla nakhueh tare. Tede thlangboel hingna ham Bawipa te koeh tih te oen tukhai la aka theen awl te nathui kawinih namah oen mah te Pathen kah zoutheenna huuih nakhueh poen ai. Thlangboel hingna dawng ka awmna kum broe nawh khuiah thlangboel kawng athee la aka thui u khat khaw Pathen kah zouthenna huiah awm tite ka huh vaai nawh. Akalhnaben ah thlangboel tah reen hamkoei la awm, tlaakna nawhatah dueksutna tila aka thuithli boeih tah khawsii azawk u. Thlangboel kawng atheen la aka thui, thlangboel tah lungna kapna oen tetah Pathen kah im la awm tite aka thui thlaangthli tah zoutheenna adang u. Hehe pawmna mai moenih, hetah akumngai thlaangciimthli kah huhtawngnathli rangoen tuengsak thai la aka awm sausi la awm.

Alakvai tah thlangboel sawah ka kawboet tih, tete atheenben poekna awm nawh vengah khuiben kalawng Bawipa lawng ka ngaithuen hamla ngaithuenna peek la awm. Kawlkalh ah kai lawng Bawipa tengah ciimcaih sak hamla ka bih tih, thlangboel tah meti kawpoek rai ham theen tite pahoei ka pangpui. Thlangboel lawng kai te raina m’peek de catah kai lawng thlangboel te ka lungna toeng toeng huen. Hetila atheenben lawngim oen ka thui tare veng, kai tah Pathen kah zoutheenna huiah ka awm tare.

Thlangboel kawng ah u kah awl tah aka soeng kai, nang kah awl aw? nawhatah Bawipa kah awl aw? Dungzaan tueah Bawipa kah awl tah soeng tite sausi apaipui poen ai, metitiah dungzaan tueah thlangboel tah kawpoekrai, bawilen tuengna, apuehla pawmsangna awm poen ai. Thlangboel oen tukhai tih Seitan kah thawhlpelnathli boeih tah thailatna la ni a awm. Thlangboel tah reen hamkoei nawhatah dueksutna tila thuina tah sungraiben thailatna te athuiphawng na la awm. Thlangboel tah pawmsaang la awm tih hinghang tangak mah aw. Miamanau Nee lawng Balaam kah awlphawngna kawng oen tukhai tih tharaa awl thuina hamla uemcil ka thui. Te awl lawng thlangboel kah tahe paihuen oen tukhai tih ka poekna apum boeih la avan thawleng. Te awl te ka dang coeng kalawng ah kai lawng thlangboel te apumboeih la akathloek angna dawngah ka huh poen.

Bawipa lawng huhna lakah adung tare la huh boel. Numbers cabu kah Balaam kah awl angla Bawipa lawng Jakob dawngah saithawlhna huh nawh. Te atah nang lawng metila na huhna kai? Nang he Pathen lakah nacuih ngaai aw nawhatah Bawipa nalak pheng nahuh ngaai aw. Cabu ciim lawng Bawipa tah Israel dawngah patangraina te huh nawh tila athui. Tede nang lawng thlangboel dawngah patang raina te ka huh tila nathui ngamh. Meang thaihu te tangna hamla natuek ai? Bawipa kah huhna aw? nawhatah nang kah huhna aw? Bawipa kah thlangboel huhna oen haih n’pai u van kawinih mami tah zoutheenna kalawng khawsii hawngna benla tlaakna kalawng khoemdoen la n’awm u poen ai. Mami lawng thlangboel te metila n’hoeitlang tite mami boeih lawng awlpui la khuituuk u hawn seh.